

Ektimaut brom Baibul

Luk 1:26-43

Pipul yu garra abum:

Meri, Josef, Einjul, Olgamen Elisabeth, Storimen.

Wanim yu garra dum o meigim bifo:

Gajim pilo blanga binji blanga Meri en Elisabeth.

Einjul bin tok langa Meri

Storimen: Meri bin pramis langa wan men neim Josef hubin grengrensan blanga King Deibid. Bat dubala nomo bin merrit yet, en det gel nomo bin kemp garam eni men.*

Josef Dum: *Josef jandap det najasaid. Brom longwei weib bingga langa Meri.*

Meri Dum: *Meri jandap wansaid la frant. Brom longwei weib bingga langa Josef. Meri garra holdim im bigwan binji dumaji imbin faindim beibi.*

Storimen: God bin jandim det einjul langa wanbala taun gulum Nesareth, dumaji imbin abum wed blanga wan gel deya neim Meri.

Einjul Dum: *Einjul garra kamat lida langa Meri en lipdimap im dubala bingga redi blanga tok.*

Josef Dum: *Josef garra jidan en luk najawei.*

Storimen: Wal wen det einjul bin kamat langa Meri, imbin tok ...

Einjul: “Meri, God im laigim yu brabli, en im jidan garram yu.”

Storimen: Wal wen Meri bin irrim det wed, imbin gida shok, en imbin bradin du, en im nomo bin sabi wotfo det einjul bin tok langa im lagijat.

Meri Dum: *Meri garra baldan langa graun en sheiksheik nomolilbit en grajimbat im gabarra en meigim im feis luk braiden.*

Einjul: “Yu nomo bradin, Meri,
dumaji God im brabli gudbinji langa yu,
en yu garra abum boiwan beibi
en yu garra gulum im neim Jisas.*
Dei garra gulum im san blanga det brabli haibala God,
en God garra meigim im jidan brabli bigbala bos
jis laik im grengrenfatha Deibid bin jidan king,
en im garra jidan bos olagijawan.”*

Meri: “Mi yanggel dijan. Ai nomo bin go garram men.
Ai nomo bin silipsilipbat garram eni men.
Hau ai garra abum beibi?”

Einjul: “Det Holi Spirit garra kaman,
en God pawa garra jidan langa yu.
Lagijat na yu garra faindim det beibi,
en blanga tharran na det beibi im speshalwan,
en dei garra gulum im God san.

“Wal yu jinggabat Elisabeth yu rileishan na.
Im kaan abum beibi, dumaji im brabli olgamen.
Bat imbin jidan femiliwei 6 mants na,
dumaji God gin dum enijing.”

Meri: “Wal mi wekingel blanga God. Im na main bos,
en mi wandim det ting garra hepin langa mi lagijat gin
weya yubin dalimbat mi.”

Einjul Dum: *Einjul garra gowei na.*

Meri bin go en luk Elisabeth

Storimen: Afta na Meri bin go langa det taun weya det olgamen Elisabeth bin jidan. en Meri bin go streit langa det haus blanga Sekaraiya, en wen imbin kamat deya, imbin tok gudei langa det olgamen.

Wal wen det olgamen bin irrim Meri tok gudei, det beibi insaid langa det olgamen binji bin jump, en det Holi Spirit bin gowin langa det olgamen,

Olgamen (Elisabeth):

“God im laigim yu, en imbin pikimat yu brom ola naja lot gel, en det beibi weya yu garra abum, im brabli speshalwan.

“Wal yubin meigm mi brabli gudbinji wen yu kaman iya, dumaji yu na mami blanga det brabli haibala bos. En wen aibin irrim yubin tok gudei, det beibi insaid langa mi bin jump, dumaji imbin gudbinji. En yu garra jidan gudbinji du, dumaji yubin bilib langa God, en ebrijing weya imbin dalim yu garra hepin truwani.”

Meri bin preisim God

Meri:

“Mi preisimbat God det brabliwan bos,^{*}
en mi brabli gudbinji langa im,
dumaji im na bin seibum mi.
Nomeda mi nomo haibala gel,
bat stil God bin jinggabat mi.